

■ erantzugu... ■



943 300 228



zuzendariari@jalgi.com

Erosketa egokiak egiten al dira merkealdian?

■ Ez dut uste beharrezko gauzak erosten direnik merkealdian. Zenbaitetan neuri ere gertatu izan zait behar ez nuen arropa erostea merkealdian, eta gero damutu! Hala ere, ez nago merkealdiaren aurka. Kontu handiz jokatu behar dela iruditzen zait, baina orokorrean onuragarria dela uste dut.

Ez dira argitaratuko izenik gabe iristen diren mezuak. Izen-abizenak eta telefono zenbakia eman behar dira. Laburtu behar izanez gero, zuzendaritzak badu horretarako eskubidea.

Begiz jo duzun jertsea edo gustuko dituzun galtzak erosteko aukera izan daiteke merkealdia. Beraz, egin duzuen galderari ez nioke ezetza edo baietza erantzungo. **Edurne Agirrezabalaga** (Zarautz)

■ Ez dakit egokiak diren merkealdian egiten diren erosketak. Nik uste dut denok egiten ditugula garai horretan; beraz, ez da izango garai txarra. Kontu pixka bat izanez gero, erosketa egoki eta merkeak

egin daitezke. **Aitor Agirre** (Zumaia)

Garai hau ez dut batere gustuko erosketak egiteko. Denak jendez beterik egon ohi dira eta izugarrizko irrika ikusten da erosteko. Niretzat penagarria da jendearen jokaera merkealdian. **Jose Mari Iparragirre** (Hernani)



galdeiozu...

Aingeru Epaltza

NAFARROAKO IKASTOLEN FEDERAZIOKO
LEHENDAKARIA

Nola moldatzen zara idazle eta ikastolen elkarteko ardurak behar bezala betetzeko?

Jon Garcia [Lizarra]



■ **DENBORAREN ADMINISTRARI** zorrotza bilakatu naiz, ez baitira horiek nire denborapasa bakarrik. Aita ere banaiz, senar, etxeko gizon, seme, neba eta anaia, iloba, lagun eta hainbat mugidatuko saltsero. *Hobby*-ak baditut eta Nafarroako Gobernuari saltzen diot neure eskulana. Bistan da, idazten nahi baino denbora gutiago egiten dut azken aldi honetan. Bederen, aspertzeko betarik ez dut.

Urtarrilaren 12tik aurrera
Luis Aranberri 'Amatiño' KAZETARIA izango da
Galdeiozu ataleko gonbidatua. Bidali zure galderak ordurako.



zuzendariari

**Gudarien etorbidea, z/g 20140 Andoain**

OHARRA: Iritzi ezberdinek toki izan dezaten, ez da komeni makinaz idatzitako 15 le-
rro baino luzeago idaztea gutun hauetan. Idatzi duenaren izena, telefonoa, helbidea eta
NANen zenbakia agertu beharko dira. Laburtu behar izanez gero, zuzendaritzak bere
esku du horretarako eskubidea. Erdaraz iristen diren gutunak ez dira argitaratuko.

Orrialde horiak... eta gorriak!!

Inork UPN alderdia hizkuntz gatazka-
rekin kezkatu ez zegoela uste bazuen, erabat erraturik zegoela aitortu beharko du. Izan ere, Telefonikak argitaratu dituen orrialde horien inguruan sortu den eztabaidak argi eta garbi utzi du Nafarroako herritarren hizkuntz eskubideekin oso arduratuta dagoela. Ezin du ulertu Nafar Gobernu bere esku duen alderdiak gizartea elebiduna izanik nola zerbitzu publikoa eskaintzen duen enpresa pribatu baten Nafarroako errealtate elebidun horri jaramonik egin ez eta hizkuntza bakarra erabiliz argitaratu ditzakeen hain erabilgarriak diren orrialde horiak. Ziur aski, UPNk pentsatu du «den-dena» aurki daitkeen leku horretan Nafarroako bi hizkuntzetatik bat ez aurkitzea hutsune handiegia zela barkatzeko eta ondorioz erretiratzeko agindu du.

Nafar Gobernuarentzat historikoki kezka handia izan da herritarren hizkuntz eskubideak zaintzea. Beraz, ez luke inoiz onartuko euskaraz ikasi nahi duten hainbat haur baldintza txarretan edukitzea euskaraz beren auzoan ikasi nahi dutelako. Ez luke inoiz onartuko Nafarroan den unibertsitatean bi hizkuntzak aukeran ez egotea ikasi nahi duten nafar guztientzat. Hori dena jakin ondoren, oso logikoa da gogor kritikatzeko hizkuntza bakarra erabili duen enpresa, eta entzun dugu hemendik aurrera presio bera erabiliko duela euskara erabiltzen ez duten gainontzeko enpresa guztien kontra. Horrela UPNko inor enteratzen bada Nafarroako enpresa batek ez duela euskara erabili, Aita Santuari jakinaraziko diote Linbora joan daitezen Zerura joan beharrean.

Nafarroa tolerantziaren herrialdea da noranahi joanda ere, noranahi begiratuta ere bi hizkuntzak harmonia eta oreka txalogarrian agertzen zaizkigu begien gozamenarako. Kartel ofizialak eta ez-ofizialak, bide seinaleak, den dena agertzen zaigu bi hizkuntzetan. Bidaia arrotzek sentitu egiten dute gure komunitatean hizkuntza batek ez duela bestea zapaltzen, eta detaile nimoño horietan gizarte tolerantetaren aurrean daudela ohartzen dira eta hau dena, Nafar Gobernuaren ahaleginari esker, nafar hizkuntz eskubideen alde egiten duen lan eskergari esker. Beraz, logikoa da orrialde horiekin gertatu dena, ezin da harmonia hautsi.

Baina agian garrantzitsuena herritarrok Administrazioan zerbitzuren bat erabili behar dugunean

aurkitzen dugun errealtatea da. Bakarrik pentsatzeak malkoak ekartzen dizkit begietara. Izan ere, funtzionarioak aurpegian irribarre zabala dutela hitz egiten digutenean eta esaten digutenean: «Egun on, euskaraz ala erdaraz nahi duzu?». Poza da sentitzen duguna momentu horietan, poza tolerantziak libreago egiten gaituelako.

Honegatik guztiarengatik ez beza inork kritika Telefonikak egindako hutsunearen aurrean hartutako neurria, hizkuntza bakarra ezarri nahi duten biolento eta intolerante horiek ez dutelako lekuri gure gizarte orekatuan.

Bestalde, jakin badakigu Telefonikari beste zerbaite eskatu diotela eta guk bat egin behar dugu neurri horrekin. Orrialde horiak izan beharrean, horiak eta gorriak izatea, horrela. Nafarroako errealtate elebiduna islatuko dugulakoan. **Iñaki Lasa** [Nafarroako AEK-ko arduraduna] • IRUÑEA

• MONTXO •

